

Bo Yu, Bo Alumno

Ta visto ku e promé dia di un año eskolar ta okashoná vários emoshon den muchanan: alegría, antisipashon, lágrimanan, èts. Ma mayornan tambe ta eksperensiá diferente sintimentu pa ku komienso di skol...ma ménos riparabel. Ta tristu ku hopi mayor ta antisipá e promé bèl di e año eskolar pa nan por deshasí di nan yunan. E mucha ta mirá komo un peso, un molèster, un interupshon di nan bida. Ki un alivio ku skol ta kuminsá pa e por hasi loke e ke!

Ma e aktitut egoista aki ta kambiando nos mentalidat pa ku edukashon di nos yunan. Antes, edukashon formal a kuminsá ku e promé año di skol básiko; un año di bewarskol tabata opshonal. Ma awendia, mayornan ta haña ku klùterskol ta ESENSIAL pa prepará pa skol básiko...anto no un año so, ma DOS. Algun mayor ta insistí pa nan yu haña un òf (preferibel) dos año di "preparashon sosial" na "speelschool" promé. Pa otronan, e "skol" aki ta muchu lat; nan ta manda nan krèsh pa un òf dos año. Ma e pensamentu aki ta sanu? Un mucha mester prepará dos año pa e por ta prepará pa e próksimo dos año pa e por ta prepará pa e próksimo dos año pa e por ta prepará pa su promé año di skol básiko? Ridikulo!

Nos ta konsiente ku tin kaso (por ehèmpel un mama soltera) ku e suseshon di krèsh, skol preparatorio, i klùterskol ta inevitabel. Ma frankamente bisá, mayornan frekuentemente ta sigui e ruta aki komo ekskusa pa deshasí di nan yunan pa nan por buska nan propio interes! Echu ta ku e tata i mama no ta dispuesto pa inbertí e tempu i esfuerso pa siña nan yunan.

Edukashon di yunan ta prinsipalmente e tarea di MAYORNAN. Den pasado, mayornan mes a eduká nan yunan. Tatanan a siña nan yunan hòmer loke nan mester sa tokante agrikultura i krio di bestia pa nan por tin eksito komo kunukero. Mamanan a prepará nan yunan muhé pa bida domestiko. Lesamentu, skirbimentu, sòm, geografía, èts. no tabata tan nesesario pa bida den e era ei.

Ma den nos era moderno, e situashon ta totalmente diferente. Analfabetismo ta inaseptabel. Sòm i diferente idioma ta esensial pa hopi trabou. Poko mayor ta sufisiente studiá pa proveé tur e edukashon ku hòbennan ta nesesitá awendia. P'esei nos ta manda nos yunan serka hende ku ta kapasitá pa eduká nan.

"Mi yu, skucha instrukshon di bo tata, i no bandoná siñansa di bo mama" (Provèrbionan 1:8; 6:20). Dios a duna MAYORNAN e tarea pa eduká nan yunan. Ma hopi mayor a abdiká nan puesto di edukadó di nan yunan, delegando esaki por kompleto na dosentenan. Ma e dosente di bèrdat ta hasi e tarea di e TATA i MAMA. Esaki no ta eliminá e responsabilidat di e mayornan pa eduká su yu.

Mayornan ku ta kapta e konsepto aki, lo kambia nan aktitut pa ku skol, e dosente, i nan propio yunan. E dosente lo ta mirá komo un aliado den e tarea di edukashon di nan yu. Ora tin "oudersavond," nan lo ta presente pa enkurashá komuniká ku esun ku ta eduká nan yu.

Tin mayor ku ta lansa tur sorto di kritika riba kabes di skol, dosentenan, fasilidatnan, gastunan, otro alumno, èts. Ma ora tin mester di hende pa sinta den komishon di mayor pa inisiá kambio i sòru ku nan propio yunan ta haña un bon edukashon, ningun ta dispuesto. Aktualmente na nos isla, tin skol sin komishon di mayor...pa falta di interes di e mayornan segun nos ta komprendé. Inkreibel!

Dosentenan tambe mester kòrda ku edukashon ta e responsabilidat di e mayornan. Ku esaki en bista, nan filosofia di edukashon, metanan, komportashon i palabranan mester reflehá e balornan ku e mayornan ta deseá pa nan yunan.

Un mucha no ta stòp di siña na e último bèl mèrdia. Di bèrdat edukashon informal ta tuma lugá henter dia. Mayornan tin e privilegio di siña nan yunan faktonan, abilidadnan, etiketa, balornan, moralidat, konosé Dios, èts. Nan ta siña dor di bo palabranan i bo ehèmpel. "E palabranan aki, ku Mi (Dios) ta ordenábo awe...bo mester siña nan kuidadosamente na bo yunan, i mester papia di nan ora bo ta sinta den bo kas, ora bo ta kana riba kamina, ora bo ta bai drumi i ora bo ta lanta" (Deuteronomio 6:6-7). Hasi uso di kada oportunitat!

Danki Dios pa esnan ku ta eduká nos yunan. Nan ta proveé un servisio enorme. Ma nunca lubidá, tata i mama, EDUKASHON DI BO YU TA BO RESPONSABILIDAT.